



Fasnacht 2013

Sujet: **25 Jöörli und keini graue Höörli**

Es isch das Joor eimol me sowit
und zum jubiliere Zit
den mir wärde scho **25 Jöörli**
und händ **keini graue Höörli**
das duett uns eigentlich erstuune
den mir händ nit immer gueti Luune
s' glingt nit jedes Unterfange
mer müesse oft bis zur Fasnacht bange
aber zum Glück isch die Dorfplatzhorde
immer bis am Fasnachtssunntig fertig worde.
Es git aber au lustigi Gschichte
über die wämer hüt brichte
mir werde us Astand keini Name nenne
dr Eint oder Ander wird sich wiedererkenne.

Bi eusem ersti Wage do simmer stolz
bruche mir no kei Holz
will mir das isch nit zum lache
händ de us Lintüecher müesse mache
denn es längt nit, ganz im Vertraue
wämer in drei Samstig will e Wage baue
wobi so hämer usere guete Quelle verno
es gäb e Prattler Clique wo das würdi go.

Bi uns isch de Fraueateil nümm so chli
den sitem 97 rede Fraue dri
Fasnacht mit Wibli cha lustig si
hauptsach hesch kei Tussi debi
doch bis jetzt sin mir verschont
drum het`sichs bis jetzt au glohnt
„Den e gmschti Gruppe das macht Sinn“

sait`s Komitee drum händs jetzt 3 Wibli drin.

Apropo Fraue do isch no zum sage
scho bi einige Sujet hämer dörfe Röckli trage
ob als Hex, Frau Antje oder Buurefrau
für uns Rueche isch das immer e Schau
so wie damals wo mir eus getraue
und Fasnacht mache als Ffürwehrfraue
mit grossem Buse und Miniröckli
eusi Bei ipackt in Netzlistrumpf und nit in Söckli
sicher einigi Fraue si nidisch gsi uf eusi Bei
d` Männer danke: Schöner als bi de Alte dehei

Es meint Eine e halb Stund vorem Umzug voller Schreg:

„Oh je mine mi Larve isch weg“

En Andere sait:“ Los mol Digge
hesch die nit dehei lo liege“?

Und wüerkli si isch dehei, mir müesse das verzelle
liegt im Abfallsack, parat zum an`d Stross usse stelle
hüt chönnti das jo nümme passiere
drum düent uns die gelbe Säck au so imponiere.

Findsch Dorfplatzrueche händ e Dachschade oder so
den froge mir eifach...wiso ??

müesse aber grad sage und do simmer grächt
i eim Joor stimmt das zu Rächt
mir erinnere uns und wänd` s nit z lut schreie
im 06 wo`s am Samstigmorge het afo schneie
die ganzi Nacht het`s durregschneit
uns isch`s Dach vom Unterstand uf de Wage gheit
am Morge de Wage flach und platt
euses usgspielte Sujet Schachmatt
uns het eimol Natur d` Fasnacht versaut
drum hämer au paar Joor kei Dach me baut.

Au mit de Traktore duets nit immer glücke
händ mol vor de Abfahrt müesse überbrücke
den Afangs Umzug s glich nonemol
und alli hinter uns finde das nit toll
zwei mol an eim Tag das isch wie gschänkt
drum het Füllinsdorf no lang an uns dänkt
aber au in Prattele isch das scho passiert
den het aber de Vermieter zimlig presiirt
uns blind und ohni Problem vertraut
und kurzerhand e neui Batterie ibaut
drum sage mir eusem Chauffeur und er wills nit kapiere
sit Joore: „ Mit zwei Esel würd das nie passiere
au das Joor chönne mir kei Panne ha
den mir händ jo zwei Rössli vordra.

So das wäre paar Münsterli gsi
ihr gsänd mir si Fasnachttechnisch voll debi
drum wämer jetzt au euse Geburtstag fiere
und hoffe es wird au nüt passiere
denn es bitzeli warte das isch kei Schärz
bis zur nächste Fasnacht am 9. März
den wärde mir d` Prattler Fasnacht wieder bsueche
und chönne sage:“ 25 und 1 mol **Dorfplatzrueche**“

